

*Na edad di 95 aña*

# Baluarde di Cultura Hubert Booi a fayece



**ORANJESTAD** – Diasabra un di e gran baluartenan di Aruba, esta Hubert “Lio” Booi a fayece na Aruba.

Sr. Booi a skirbi literatura, obra musical y tambe e tercer couplet di Aruba su himno. Un parti di su trabou den e periodo aki ta na Biblioteca Nacional Aruba den forma di un coleccion di grabacion

y manuscrito di entre otro storia y entrevista cu hende di edad halto, cu Shon Lio hunto cu Ito Tromp a traha.

Sr. nace na Boneiro na aña 1919 pero desde añanan 30 tabata biba na Aruba. Tabata viudo di Flora Quintina Coronel y tabata biba na Kamerling Onnestraat 27. E tata di un yiu hombre y 4 yiu muhe. El a traha na gobierno y despues di a traha como

empleado di banco y como tenedo di buki, sr. Booi a bira hefe suplente di Oficina di Turismo y di Arubaanse Voorlichtingsdienst.

Na 1963 el a bira hefe di Oficina di Cultura y Educacion y di 1978 te ora cu el a bay cu pensioen na 1980 el a traha como Hefe di Instituto di Cultura. Departamento di Cultura y minister encarga cu Cultura, a duna palabranan di condolencia pa su famia.

## Su obranan

Sr. Booi mes tambe a produci hopi; ‘Perla di Caribe’, 1955, obra teatral; ‘Golgotha’, un drama religioso, publica den “Antilliaanse Cahiers”, 1969; ‘Muchila’, un antologia cu poesia y prosa, 1969 y ‘Amor di Kibaima’, musical, 1969.

Como poeta di obra na Papiamentu sr Booi a skirbi entre otro texto di cancion pa Padu Lampe.

Na aña 1999 sr. Booi a ricibi e premio literario ‘Cadushi di Cristal’ pa su contribucion na idioma Papiamentu y su literatura. Y Instituto di Cultura (awor Departamento di Cultura) tambe a reconoce Hubert Booi su trabou: e patio na Cas di Cultura ta carga su nomber desde 2003. 22 di februari 2007 a presenta un



antologia di su obranan cu diferente texto nunca antes publica, esta ‘E flamingo di Aruba’.

## Idioma

Manera menciona sr. Booi

tabata hopi interesa den e idioma Papiamentu y a duna hopi hende curso. Banda di esaki e tabatin di diferente otro idioma entre otro Latin y Ruso. □